

უნივერსიტეტში სტიპენდიების  
დანიშვნისა და გაცემის წესი



SPORTUNI

---



## მუხლი 1. ზოგადი დებულებები

1. სტიპენდია ემსახურება სტუდენტთა მოტივაციის გაზრდასა და კონკურენტული სასწავლო გარემოს შექმნას.
2. აღნიშნული წესი არეგულირებს სსიპ საქართველოს ფიზიკური აღზრდისა და სპორტის სახელმწიფო სასწავლო უნივერსიტეტის სტუდენტებისათვის სტიპენდიების დანიშვნას და ვრცელდება სასწავლო უნივერსიტეტის ყველა სტუდენტზე.

## მუხლი 2. სტიპენდიის მოპოვება და დანიშვნა

1. სსიპ საქართველოს ფიზიკური აღზრდისა და სპორტის სახელმწიფო სასწავლო უნივერსიტეტში გაიცემა საუნივერსიტეტო სტიპენდია.
2. საუნივერსიტეტო სტიპენდია მოიპოვება სტუდენტის მიერ ყოველსემესტრულად მიღწეული შედეგების საფუძველზე და მოქმედებს ერთი სემესტრის განმავლობაში.
3. სტიპენდია ინიშნება და გაიცემა წინა სასწავლო სემესტრის აკადემიური მოსწრების შედეგების გათვალისწინებით, სტიპენდიის კანდიდატების შორის შერჩევის საფუძველზე.
4. აკადემიური მოსწრება გამოითვლება სტუდენტის მიერ უნივერსიტეტში წინა სასწავლო სემესტრის განმავლობაში დარეგისტრირებულ სასწავლო კურსებში (არანაკლებ 30 კრედიტი) მიღებული ქულების საშუალო აკადემიური შეფასებით.
5. სტიპენდიის მიღების შესაძლებლობა აქვთ სტუდენტებს ამ მუხლის მე-2 პუნქტის და მე-3 მუხლის შესაბამისად და სემესტრულ შეფასებებში თითოეული სასწავლო კურსის შეფასება არ არის 71 ქულაზე ნაკლები.
6. გარდა სემესტრული აკადემიური შედეგისა, სტიპენდიის დანიშვნის დროს გამოიყენება მონაცემები სტუდენტის მონაწილეობის შესახებ სტუდენტურ, სასწავლო-სამეცნიერო და სპორტულ აქტივობებში.
7. სტიპენდია არ ინიშნება:
  - ✓ სტიპენდიის დანიშვნის მომენტისთვის სხვა სტიპენდიის /საუნივერსიტეტო დაფინანსების მქონე სტუდენტს;
  - ✓ სტუდენტს, რომელსაც სრულად არ აქვს ათვისებული საგანმანათლებლო პროგრამის შესაბამისი ეტაპისათვის გათვალისწინებული კრედიტები;
  - ✓ წინა სასწავლო სემესტრში მობილობით გადმოსულ სტუდენტს;
  - ✓ სტატუს შეწყვეტილ და სტატუს შერჩეულ სტუდენტებს;
  - ✓ სტუდენტს, რომელსაც ერთ-ერთ რომელიმე სასწავლო კურსში აქვს 71 ქულაზე ნაკლები.

## მუხლი 3. საუნივერსიტეტო სტიპენდია



საქართველოს ფიზიკური აღზრდისა და სპორტის სახელმწიფო სასწავლო უნივერსიტეტის მიერ დანიშნული სტიპენდია შეადგენს:

- ✓ თვეში 150 ლარს იმ სტუდენტებისათვის, რომლებსაც ათვისებული აქვთ წინა სემესტრით გათვალისწინებული ყველა კრედიტი და მათი საშუალო ქულა არის 91 და მეტი და შეესაბამება წინამდებარე წესის მე-2 მუხლის მე-5 პუნქტს.
- ✓ თვეში 100 ლარი იმ სტუდენტებისათვის, რომლებსაც ათვისებული აქვთ წინა სემესტრით გათვალისწინებული ყველა კრედიტი და მათი საშუალო ქულა არის 81-90 ქულა და შეესაბამება წინამდებარე წესის მე-2 მუხლის მე-5 პუნქტს..

#### მუხლი 4. საუნივერსიტეტო სტიპენდიის დანიშვნის პროცედურა

1. სტიპენდიის დანიშვნისათვის კანდიდატების შერჩევას ახდენს ფაკულტეტის საბჭო, რომელიც იხილავს სტუდენტის მიღწევებს და არსებულ მონაცემებს.
2. სტიპენდიების კანდიდატებს შორის სტიპენდიანტთა გამოვლენა ხდება კონკურსანტთა აკადემიური მოსწრების მონაცემების მიხედვით (გამოცდებზე მიღებული შეფასების საშუალო მაჩვენებლებით).
3. მონაცემთა თანაბრობის შემთხვევაში მხედველობაში მიიღება ყოველი ერთით წინა სემესტრის შეფასებები, ხოლო საჭიროების შემთხვევაში ერთიანი ეროვნული გამოცდების შედეგების შემდგომ მიღებული სკალირებული ქულა.
4. სტიპენდიის მინიჭების შედეგების გამოცხადება ხდება საჯაროდ.
5. წარმატებული სტუდენტთათვის სტიპენდიის, ერთჯერადი ჯილდოს გაცემის და სხვა სახის წახალისების წესს ბრძანებით ამტკიცებს უნივერსიტეტის რექტორი.

#### მუხლი 5. სხვა სახის წახალისება

უნივერსიტეტის რექტორი თავისი ინიციატივით ან სტუდენტ(ებ)ის თხოვნის საფუძველზე ახორციელებს სხვადასხვა სახის წამახალისებელ ღონისძიებებს, რომლებიც ემსახურება სტუდენტური ცხოვრების გაუმჯობესებას.

#### მუხლი 6. სტიპენდიის შეჩერება და შეწყვეტა

1. სტიპენდიანტისთვის სტუდენტის სტატუსის შეჩერების შემთხვევაში მასზე ავტომატურად ჩერდება სტიპენდიის გაცემა, რომელიც აღდგება იმავე სემესტრში სტუდენტის სტატუსის აღდგენის შემთხვევაში სტატუსის შეჩერების დღისთვის სტიპენდიის დარჩენილი ვადით.
2. უნივერსიტეტის ფინანსური მდგომარეობის გაუარესების ან ფორსმაჟორული გარემოებების



შემთხვევაში უნივერსიტეტის რექტორი უფლებამოსილია შეაჩეროს სტიპენდიის გაცემა, რის შესახებაც წინასწარ წერილობით აცობინებს სტუდენტს. სტიპენდიის გაცემა აღდგება შესაბამისი გარემოებების აღმოფხვრისთანავე.

3. სტიპენდიის შეწყვეტის საფუძვლებია:



- ა) სტუდენტის სტატუსის შეწყვეტა;
  - ბ) ლექცია/სემინარების სისტემატიური გაცდენა, სასწავლო პროცესში მონაწილეობის მიუღებლობა;
  - გ) უნივერსიტეტის შინაგანაწესის და ეთიკის კოდექსის დარღვევა; დ) პირადი განცხადება;
  - ე) უნივერსიტეტის რეპუტაციის შელახვა.
4. სტიპენდიის შეწყვეტის შესახებ სკოლის საბჭო შესაბამისი წარდგინებით მიმართავს უნივერსიტეტის რექტორს. სტიპენდიის გაცემა შეწყდება რექტორის ბრძანების გამოცემის მომდევნო თვიდან.

### მუხლი 7. სტიპენდიის მინიჭების შედეგების აპელაცია

1. სტიპენდიის მინიჭების შედეგების სააპელაციო განცდების მიღება მიმდინარეობს სტიპენდიის მინიჭების შედეგების გამოცხადებიდან 3 სამუშაო დღის ვადაში.
2. სააპელაციო განცხადებები მიიღება დეკანატებში.
3. დეკანატი 2 სამუშაო დღის ვადაში განიხილავს სააპელაციო განცხადებებს და იღებს საბოლოო გადაწყვეტილებას.

### მუხლი 8. დასკვნითი დებულებები

აღნიშნულ წესში ცვლილებებისა და დამატებების შეტანა ხდება რექტორის ბრძანებით.